

KONTROL MOZIOA

DONOSTIARREI AUTOKONTSUMO ENERGETIKOARI BURUZKO AHOLKULARITZA EMATEKO UDAL ENERGIA BULEGOA SORTZEARI BURUZKOA

Garbiñe Alkiza Lopez de Samaniego EH Bildu udal taldeko zinegotziak Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2022ko abenduaren 12an Lurralde Garapen eta Planifikazio Batzordean aztertutako interpelazioaren ondorioa da.

JUSTIFIKAZIOA

2020ko martxoaren 17an, Tokiko Gobernu Batzordeak Donostiarako Larrialdi Klimatikoaren Adierazpena onartu zuen. Erabakiaren berri emateko zabaldutako idazkian ondo jasotzen zen bezala, larrialdi klimatikoa adierazteak berekin dakar konpromiso politiko erreal eta lotesle batzuk betetzea, eta horien artean zegoen, besteak beste, “% 100 berriztagarria den energiaren alde apustu egitea”.

Azken datuen arabera (2019), Hego Euskal Herrian energia-kontsumoa 80 TWh da. Kontsumo maila bereziki altu horrek mendekotasun handia eragin du, bai inportazioari dagokionez (% 85 baino gehiago), bai ezaugarriei dagokienez (% 80 energia fosilak). Energia berriztagarrien presentzia, berriz, urria da (% 14).

Donostia egoera berean dago. Denborak aurrera egin ahala, krisi ekologikoa areagotu egiten da eta horren ondorioak pairatzen ari gara. Erronka ez da nolanhikoa, eta etorkizunari berme osoz aurre egiteko ezinbesteko baldintza da neurri ausartak eta eraldatzaileak ezartzea.

Ekoizpen eta kontsumo eredu berri batera moldatu beharrean gaude, baliabide iraunkor eta berriztagarrietan oinarrituko dena. Ildo horretan, premia eta lehentasunak da ezaugarri hauen arabera energia-sorkuntzak erraztea eta hedatzea lehen aukera gisa herritarrentzat, enpresentzat eta administrazio publikoarentzat.

Egoeraren larritasunaz jabetuta, herritar batzuk dagoeneko hasi dira autokontsumorako

energia ekoizten, bai modu indibidualean, bai komunitatean. Donostian ere badaude horrelako ekimenak, abian daudenak edo abiatzear daudenak, eta tokiko erakundeen ardura da prozesu horiek erraztea. Larrialdi Klimatikoaren Adierazpenak ondorengoa jasotzen du:

“Tokiko gobernuaren konpromisoa ezinbesteko pieza da; baina, pertsonen, erakundeen, kolektiboen eta era guztietako eragile sozial eta ekonomikoen laguntzan oinarritzen da hura, eta legegintzaldi eta ziklo politiko bat baino laguntza luzeagoa behar du. Eta donostiar guztiguztien inplikazioa ere behar du; mugitzeko, hondakinak sortzeko edota argia eta gasa kontsumitzeko dauzkagun ohiturak aldatzeko.”

Eta Marisol Garmendia zinegotzi delegatuak berak ere, tokiko energia-komunitateei eskaini beharreko laguntza posibleez galdetuta, adierazi zuen kudeaketa errazteko bideak jarri behar direla. Finean, energia berriztagarrien aldeko apustuak lankidetzan publiko-komunitarioaren ariketa bat beharko luke. Helburu horiek lortzeko, ezinbestekoa izango da komunikazioaren, lege eta administrazioaren eta finantzaren arloetako aholkularitza eta laguntzak ematea gure hiritarrei (batik bat, plangintzaren, hirigintzaren eta fiskalitatearen eremuetan), martxan dauden edo jar daitezkeen komunitate berriak sustatzeko eta herritarren ekimena bultzatzeko.

Horregatik guztiarengatik, eta ikusita Udal Gobernuak alor honetan konpromiso zehatzik hartu ez duela, honako hau da behean sinatzen duen zinegotziak aurkeztutako

KONTROL MOZIOA:

1.- Donostiako Udalbatzak hertsatuki eskatzen dio Udal Gobernuari abian jar dezala donostiarrei autokontsumo energetikoari buruzko aholkularitza emateko Energia Bulego bat, herritarrei batez ere plangintzaren, hirigintzaren, legearen eta fiskalitatearen eremuetan laguntzeko.

Donostian, 2022ko abenduaren 15ean

Garbiñe Alkiza Lopez de Samaniego

EH Bildu udal taldeko zinegotzia